



LAPORAN LIPUTAN MEDIA

RABU / 18 OKTOBER 2023

- 1. 'RAMAI DATANG SEBAB RUMAH TIADA BERAS' – SINAR HARIAN**
- 2. KERAP PANTAU SITUASI BEKALAN – HARIAN METRO**
- 3. PADI: HARGA LANTAI BAHARU MASIH RENDAH – UTUSAN MALAYSIA**
- 4. BENIH PADI SAH DIJUAL DI 'PASARAN GELAP' – KOSMO**

DISEDIAKAN OLEH:

CAWANGAN KOMUNIKASI KORPORAT (MADA)

KERATAN AKHBAR : BERITA HARIAN

TARIKH : 18 OKTOBER 2023

PERKARA : ISU SEMASA



Haslinda menunjukkan antara barangan dapur disediakan di Pondok Sedekah yang terletak bersebelahan premis perniagaannya di Kampung Pengkalan Maras di Kuala Nerus.

'Ramai datang sebab rumah tiada beras'

Aduan orang susah runtun hati pengasas Pondok Sedekah

Oleh NORHASPIDA YATIM
KUALA NERUS

Seorang peniaga yang menyediakan beras dan keperluan dapur secara percuma mendedahkan terdapat penerima sumbangan yang sudah tiga hari tidak menanak nasi kerana tidak mampu membeli beras.

Haslinda Wahab, 40, yang membuka bangsal kecil dinamakan Pondok Sedekah bersebelahan premis perniagaannya di Pengkalan Maras, di sini berkata, aduan itu amat meruntun hatinya.

"Saya tak sangka ramai yang datang ke sini sebab rumah tiada beras. Ada yang minta izin ambil beras sebab sudah tiga hari terputus bekalan.

"Ada juga yang seminggu rumahnya tiada beras. Kalau mampu beli pun beras bungkus sikit-sikit dari kedai runcit seberat 1 kilogram (kg) untuk sekali masak.

"Kebanyakan mereka yang berdepan situasi ini ada ahli keluarga yang ramai mungkin lebih daripada lima anak," katanya ketika ditemui di Pondok Sedekah di sini pada Isnin.

Ibu kepada empat anak itu berkata, pondok agihan keperluan asas makanan yang dibuka sejak seminggu lalu menyediakan beras 5kg, minuman coklat, kicap, minyak, biskut, mi



Haslinda (kanan) menyediakan barangan keperluan asas seperti beras yang mendapat permintaan tinggi daripada golongan memerlukan di Pondok Sedekah.



segera dan susu tepung.

"Ramai juga datang untuk dapatkan susu anak.

Tetapi, paling ramai datang nak beras. Ramai mengadu sangat terkesan dengan kenaikan harga beras.

Bayangkan yang 5kg dari belasan ringgit naik sehingga RM20 ke atas. Yang kampil 10kg pula harganya kini lebih RM40 mencecah RM50.

"Kalau keluarga anak ramai sekampit beras tu tahan dalam dua tiga hari sahaja. Biasanya mereka yang datang ambil barangan ni kita akan tanya dulu untuk pastikan penerima adalah mereka yang benar-benar memerlukan," katanya.

Haslinda memberitahu, terdapat juga insan pemurah yang turut menyumbang dengan menyalurkan wang ringgit bagi membeli barangan yang akan diagihkan di pondoknya.

"Saya sebenarnya dah lama agih bantuan kepada golongan susah tetapi sebelum ini ia diberikan ke rumah dan melibatkan individu yang sama. Kali ini, bila saya buat kelainan macam ini ada individu berlainan yang tampil. Kita pun tak tahu dia sebenarnya hi-

dup susah.

"Setakat ini paling jauh datang dari sekitar Kuala Terengganu dan ada juga minta bantuan dari Kemaman," katanya yang aktif dalam misi bantuan sejak 2019.

Haslinda sebelum ini merupakan penerima bantuan Majlis Agama Islam dan Adat Melayu Terengganu (MAIDAM) dan Jabatan Kebajikan Masyarakat (JKM) selepas menjadi ibu tunggal.

"Selama 13 tahun saya bergelar ibu tunggal, jadi saya faham situasi mereka yang hidup susah sampaikan beras pun tak mampu nak beli.

"Selepas buat pinjaman dari Amanah Ikhtiar Malaysia untuk memulakan perniagaan, saya bersyukur ia amat membantu sehingga sekarang.

"Saya juga bersyukur sebab saya kini mampu membantu untuk meringankan beban mereka yang susah. Saya nekad untuk tidak berhenti dan doakan saya dapat teruskan sumbangan ini," ujarnya yang kini telah tiga tahun mendirikan rumah tangga bersama Muhammad Asyraf Ahmad Subri, 30.

KERATAN AKHBAR : HARIAN METRO

TARIKH : 18 OKTOBER 2023

PERKARA : ISU SEMASA

Kerap pantau situasi bekalan

KPDN periksa 31,100 premis di seluruh negara babit pelbagai peringkat rantaian pengedaran

Oleh Muhaamad Hafis Nawawi
mhafis@hmetro.com.my

Serdang

Kementerian Perdagangan Dalam Negeri dan Kos Sara Hidup (KPDN) memeriksa 31,100 premis di seluruh negara membatinkan pelbagai peringkat rantaian pengedaran termasuk pengilang, pemborong dan peruncit menerusi Op Jamin.

Timbalan Menteri, Fuziah Salleh berkata, pemeriksaan diadakan bermula 7 Julai hingga kelmarin dan daripada jumlah itu, sebanyak empat kes diambil ke atas peniaga kerana disyaki melakukan kesalahan mengikut Akta Perlindungan Pengguna 1999.

Selain itu katanya, empat kes membatinkan Akta Perihal Dagangan 2011 dan dua kes mengikut Akta Timbang dan Sukat 1972 menjadikan 10 kes secara keseluruhannya diambil tindakan oleh KPDN.

"Manakala sebanyak 331 aduan membatinkan aduan harga, bekalan dan



FUZIAH hadir pemeriksaan Op Jamin di Pasar Raya Super Seven, Cheras Jaya, semalam.

lain-lain berkaitan beras diterima dalam tempoh yang sama dan telah disalurkan kepada Kementerian Pertanian dan Keterjaminan Makanan (KPKM) untuk tindakan lanjut.

"Tujuan pemeriksaan ini dilakukan adalah bagi melihat sendiri situasi semasa yang berlaku di lapangan

berhubung kedudukan bekalan dan harga beras di peringkat runcit serta barangan keperluan harian yang lain termasuk gula, minyak masak dan sebagainya," katanya.

Beliau berkata demikian pada sidang media selepas melaksanakan pemeriksaan Op Jamin di Pasar Raya

Super Seven, Cheras Jaya, di sini, semalam.

Turut hadir pengurusan tertinggi kementerian, Bahagian Penguat Kuasa (BPGK) KPDN dan Penguat Kuasa Kawalselia Padi dan Beras (KPB) Negeri Selangor serta KPKM.

Fuziah berkata, bermula pada 7 Julai lalu, KPDN dan

KPKM melancarkan Kolaborasi Bersepadu Ops Jamin bagi memastikan keterjaminan bekalan beras dengan harga yang stabil dan terkawal untuk keperluan pengguna.

"Pada masa yang sama, pemeriksaan Op Jamin ini bagi mengembalikan keyakinan rakyat terhadap Ke-

menterian.

"KPDN memberi jaminan akan terus membantu KPKM dalam melakukan pemeriksaan di bawah Op Jamin di seluruh Negara.

"Pada masa yang sama akan terus menggiatkan tindakan penguatkuasaan di bawah perundangan serta bidang kuasa KPDN terutamanya dalam menangani isu penukaran label kempit beras yang dikhuatiri berlaku susulan pelarasan harga baharu bagi beras putih import (BPI)," katanya.

Beliau berkata, tindakan undang-undang akan diambil ke atas mana-mana pihak yang didapati membuat perihal dagangan palsu mengenai kandungan, jenis atau nama mengikut Seksyen 5 Akta Perihal Dagangan 2011 [Akta 730].

"KPDN juga menguatkuasakan Akta Timbang Dan Sukat 1972 [Akta 71] dan sekiranya berlaku pelanggaran undang-undang berkaitan alat timbang dan sukat membatinkan padi dan beras, tindakan juga boleh diambil ke atas pihak yang terbabit," katanya, semalam.

KERATAN AKHBAR : UTUSAN MALAYSIA

TARIKH : 18 OKTOBER 2023

PERKARA : ISU SEMASA

Padi: Harga lantai baharu masih rendah

PASIR SALAK: Harga baharu belian padi RM1,300 satu tan berbanding RM1,200 sebelum ini belum cukup menggem-birakan pesawah kerana mendakwa ia masih belum dapat menampung kos input yang semakin meningkat.

Pesawah di Sungai Manik di sini berkata, mereka menjangkakan kenaikan harga lantai belian padi yang lebih tinggi untuk membantu meningkatkan pendapatan mereka.

Kata mereka, walaupun berlaku kenaikan yang diumumkan dalam Belanjawan 2024 baru-baru ini, ia belum cukup untuk melegakan pesawah.

Ketua unit pesawah Blok D di Sungai Manik, Helme Iskandar Muhamad berkata, di unitnya terdapat 68 pesawah yang rata-rata merasakan harga baharu padi yang diumumkan kerajaan tidak mencukupi untuk mereka meraih pulangan yang setimpal dengan sawah yang mereka usahakan.

Menurutnya, ini berikutan kos sawah meningkat seperti kenaikan harga benih padi, baja dan racun dan kos upah.

"Harga baharu padi yang di-



PESAWAH berhimpun menuntut harga belian padi yang lebih tinggi di Sungai Manik, Pasir Salak, Perak.

umumkan iaitu naik daripada RM1,200 kepada RM1,300 memang tidak cukup buat kami sebab kos sawah sudah meningkat.

"Daripada upah mesin padi, merata tanah, membajak sawah, membaja dan meracun, semuanya mahal.

"Harga beras mahal tetapi kenapa harga padi masih rendah. Kenaikan harga padi yang

diumumkan kerajaan tidak memberi kesan yang besar terhadap pendapatan kami, sepatutnya kenaikan lebih tinggi," katanya kepada *Utusan Malaysia*.

Seorang lagi pesawah, Masrol Kudis berkata, mereka mengharapkan kenaikan harga padi yang lebih tinggi diumumkan, namun, agak kecewa apabila harga baharu padi yang

diumumkan masih rendah.

Katanya, kenaikan itu masih tidak mampu memberikan hasil yang lebih memuaskan kepada pesawah jika ditolak kos membuat sawah.

"Kami harap kerajaan sedia mengkaji lagi harga beras supaya ditambah lagi ke paras yang berbaloi untuk pesawah disebabkan kos mengusahakan sawah sudah meningkat," ujarnya.

KERATAN AKHBAR : KOSMO

TARIKH : 18 OKTOBER 2023

PERKARA : ISU SEMASA

Benih padi sah dijual di 'pasar gelap'

Oleh **MOHD. RAFIE AZIMI**

ALOR SETAR – Kalangan pesawah di negeri ini merungut berikutan sukar mendapatkan benih padi sah pada harga berpatutan ketika jadual penanaman padi di sesetengah kawasan sepatutnya bermula hujung bulan lalu.

Pengerusi Badan Bertindak Petani Lembaga Kemajuan Pertanian Muda (MADA), Che Ani Mat Zain berkata, rata-rata pesawah 'pening' setelah Pertubuhan Peladang Kawasan (PPK) yang menjadi lokasi mendapatkan benih pada harga berpatutan juga tidak memiliki bekalan seperti diharapkan.

Katanya, kebanyakan PPK memaklumkan bahawa kilang-kilang yang dibenarkan membekal benih padi memberi alasan kononnya benih padi yang disediakan untuk penanaman musim ini masih belum diluluskan Jabatan Pertanian.

"Namun yang menghairankan, benih-benih itu ada pula dijual di 'pasar gelap'. Harganya cukup mahal iaitu lebih RM50 sekampit berbanding harga RM35 di pintu kilang seperti ditetapkan kerajaan.

"Langkah ini sudah tentu

memberi tekanan kepada pesawah, apatah lagi kalau mengikut jadual dikeluarkan MADA, mereka sepatutnya melaksanakan kerja-kerja menabur benih hujung bulan lalu," katanya ketika dihubungi semalam.

Ujarnya, pihak yang menjualnya pula dilihat bertindak secara licik apabila mereka tidak mengeluarkan sebarang resit bagi proses pembelian.

"Kita minta pihak Bahagian Kawal Selia Padi dan Beras atau Kementerian Perdagangan Dalam Negeri dan Kos Sara Hidup (KPDN) supaya mengambil tindakan. Kita tak mahu pesawah dipermainkan dengan cara begini," katanya.

Sementara itu, Exco Pertubuhan Persaudaraan Pesawah Malaysia (Pesawah), Abdul Rashid Yob berkata, apa yang berlaku menunjukkan seolah-olah kilang yang mengedar benih padi itu lebihutamakan pihak tertentu yang menjadi rangkaian mereka, sebelum menghantar bekalan ke PPK.

"Saya dimaklumkan ada petani yang duduk di Kota Kuala Muda terpaksa 'mencari-cari' benih di sebelah Kedah utara. Itu pun mereka terpaksa beli dengan harga mahal," katanya.



PESAWAH memasukkan benih padi ke dalam mesin penabur padi.
- GAMBAR HIASAN